

scharpff vnd spitzgeschnittenen Federn/ mit einem sonderlichen/ von hartem dichten Holz/ glatt vnd Linien gleich gehobelten Bret / mit einem oder mehr/ auß Messing/ zusammen gepaptem Papier/ oder sonsten anderer steiffen dünnen Materien/ gerecht außgeschnittenen Winckelhäcklein / endlich mit einem Instrument / Rectificatorium oder Declinatorium von den Gelehrten/ von mir der Ersorcher genant / dardurch nemlich aller Orten/ aller Wänden/ aller Mauern/ Dächer/ Bergen/ &c. daran man Sonnhren zu versertigen gemeint / eigentliche beschaffenheit vnd standt / nach den vier Orten der Welt/ (sintemal ohne diese fürgehende warnehmung vnd wissenschaft nimmermehr einige rechtschaffene vnfehlbare Sonnhren gemacht werden kan) zu erkündigen vñ zu erforschen. Weil dann zu reissung aller vnd jeglicher Sonnhren / so auß diesem andern Fundament gemacht werden solle / eben auch diese jetztbesagte Instrumenten / auß denen in gemeltem I. Capit. deß ersten Fundaments angeregten Ursachen / wie dann auch darüber noch eines Bley- oder Wasserwäglins/ du von nöthen haben wirst: So magstu dich ebener gestalt allhier vor allen dingen/ so wol mit dem einen/ als dem andern gefast machen vnd versorgen. Vnd wolte ich dich / wie obgemeldte Winckelhäcklein zu machen / wie auch angeregtes Rectificatorium oder Declinatorium gestalt / vnd ebenmässig zuzurichten/ dich anmütiger fürß hiermit schlechter dingen zu dem 3. vnd 5. Capit. deß ersten Fundaments verwiesen haben. Zum oberfluß aber / hastu gleichwol noch zu endt nechstkommenden II. Cap. dasselbige Declinatorium beygedruckt/ zu sehen.

Belangendt aber das gedachte Bley- vnd Wasserwäglein / so wirdt dasselbige gemacht auß dreyen (in form eines grossen Lateinischen A, vnd zwar so eng oder weit von einander/ als einem geliebet) zusammen gefügten Bäcklein / doch also / wann es auffrecht auff beyde Füße gestellet / daß es fest vnd gewiß / auch sein gleich vnd Bleyrecht / so viel möglich / auffstehen möge / vor eins.

A iij vnd